

■ COLUMNA

# La Surselva marida

DA DAVID TRUTTMANN

La Surselva marida – tge bell! Tgi che na crai betg, sto mo leger ils inserats sursilvans en La Quotidiana. Para datti ils 8 da favrer 2002 in supplement spezial davart il tema «maridar» en nossa gasetta super-sur-regiunala ed inter-trans-rumantscha. Ma jau scumet mes chau che quel supplement – sur da quest tema multiglobal e monogam – cumpara mo sin las paginas surselvo-filas. Quai è in sbagli cardinal. La franzosa schess in «faux-pas». Pertge? Okay, jau declar: La redacziun da La Quotidiana, surtut il charedactur e ses pledader da pressa Murgnac, sa lamentan adina che lur amada gasetta vegnia legida mo da quatter giats. E quai vegn er a restar uschia, sche La Quotidiana propagescha adina mo maridaglias sursilvanas. Lura dat quai eba il medem resultat sco tar ils giats da vischnanca – in ghetto.

Perquai mia proposta: Pertge betg introducir in marketing aggressiv per maridaglias sur ils confins idiomatics ora. Quai pudess far La Quotidiana en collavuraziun cun Radio e Televisiun Rumantscha. Anzi, la Lia rumantscha pudess perfin incaricar ina Taskforce cun ils trais anghels d'amur *Martin Cabalzar, Bernard*



*Cathomas e Peter Egloff.* Il resultat da las acziuns cuminaivlas fiss lura per exempel che in hotelier tujetschin maridass ina scolasta putera, che ina tessunza jaura maridass in turisticher surmiran, u che in pur vallader vess la tscherna tranter ina chasarina lumneziana ed ina cusunza da Trun. Ils emprims plects dals pops dals pèrlis fissan segir: «Jau sun in Rumantsch Grischun ed jau hai num Dumeni.» Las matas vessan il medem num. Enstagl da registrar las naschientschas, pudess ins gist abunar per mintga uffant La Quotidiana e tetovar sin il frunt las frequenzas dal Radio Rumantsch. Dal rest anc in tip per tut ils umens: Las dunnas engiadinaisas èn fitg at-

tractivas. Ellas gudognan adina il milliun da Benissimo.

Apropos maridar, en l'inserat Amenziunà da La Quotidiana stat scrit: «Singuls fatgs vegnan discussiunai comunablamein.» Jau hai stuì studegiar ina vaira pezza sur da questa frasa: «Singuls fatgs vegnan discussiunai comunablamein». Basta, tar ina nozza maridan normalmain in um ed ina dunna, sobiso en Grischun. E normalmain èn er tuts dus d'accord da maridar. E normalmain discutan els ensemen, co exactamain che els vulan festivar lur bel di. Mintga detagl vegn discutà. L'inserat di però che mo «singuls fatgs» vegnian discussiunads comunablamein. Tge na vegn lura betg discussiunà? Tge auters «singuls fatgs» restan secrets? – Basta, grazia a l'agid dad in colleg sursilvan hai jau chattà la soluziun: *Gion Schwarz* vul vender turtas da nuschi engiadinaisas en il Parc Alpin. Quai pudess esser fatal per mia bella proposta da marketing e per mia idea dal barat intercultural. Perquai stoss jau raquintar questa novitad a la redacziun da La Quotidiana.

Egist anc insatge: Il Surmeir ha per il mument in tal casino turistic, che maridar na vegn sobiso betg en dumonda.